



Reykjavíkurborg
mannréttindaskrifstofa

Reykjavík, 6. júní 2017
R14070101
2350
TIA

Borgarráð
Ráðhús Reykjavíkur
Tjarnargötu 11
101 Reykjavík

Ársskýrsla ferlinefndar fatlaðs fólks 2016

Meðfylgjandi er ársskýrsla ferlinefndar fatlaðs fólks fyrir árið 2016 sem send er borgarráði til kynningar.

Með kveðju

Tómas Ingi Adolfsson
sérfræðingur

Hjálagt:

Ársskýrsla 2016

FERLINEFND FATLAÐS FÓLKS Í REYKJAVÍK



Um ferlinefnd fatlaðs fólks í Reykjavík

Í nóvember 1994 var samþykkt í borgarráði að kosin yrði nefnd til þess að vinna að ferlimálum fatlaðs fólks. Skipan nefndarinnar þá var með þeim hætti að einn fulltrúi nefndarinnar kom frá Borgarskipulagi, annar frá embætti borgarverkfræðings, þriðji frá embætti byggingafulltrúa og tveir fulltrúar væru skipaðir frá Sjálfsbjörgu. Frá þessum tíma hefur verksvið og skipan nefndarinnar tekið ýmsum breytingum.

Samkvæmt erindisbréfi ferlinefndar frá árinu 2004 var skipan nefndarinnar með þeim hætti að formaður nefndarinnar var formaður stjórnar Fasteignastofu Reykjavíkurborgar en aðrir fulltrúar í nefndinni voru skipaðir af Blindrafélagi Íslands, Sjálfsbjörg, Þroskahjálp og Öryrkjabandalagi Íslands. Skipan nefndarinnar tók aftur breytingum árið 2010 en þá var formaður nefndarinnar skipaður af borgarráði. Þriggja tilnefninga í nefndina var óskað frá ÖBÍ sem skyldu taka tillit til mismunandi aðgengisþarfa og Félag eldri borgara fékk jafnframt fulltrúa inn í nefndina en ekki var óskað sérstaklega eftir tilnefningu frá Sjálfsbjörg.

Árið 2014 færðist umsjón með starfsemi nefndarinnar til mannréttindaskrifstofu. Starfsmaður nefndarinnar kemur frá skrifstofunni og situr mannréttindastjóri Reykjavíkurborgar jafnframt fundi nefndarinnar. Óskað var eftir tilnefningum frá sömu hagsmunaaðilum og 2010 en við nefndina bættist fulltrúi frá minnihluta í borgarstjórn.

Verksvið ferlinefndar

Ferlinefnd stuðlar að því að allar byggingar í eigu Reykjavíkurborgar og annað húsnæði þar sem almenningur þarf að sækja þjónustu á vegum borgarinnar, svo og götur, gangstéttir og önnur opinber svæði í borgarlandinu, séu aðgengileg fötluðu fólki með mismunandi aðgengisþarfir.

Ferlinefnd mótar stefnu í ferlimálum, tekur ákvarðanir og gerir tillögur til umhverfis- og skipulagsráðs sem varða verksvið hennar. Ferlinefnd er ráðgefandi fyrir borgarráð í aðgengismálum fatlaðs fólks. Hún skal hafa frumkvæði að verkefnum sem stuðla að bættu aðgengi fatlaðs fólks í samræmi við heildarstefnu í aðgengismálum fatlaðs fólks og fjárheimildir nefndarinnar hverju sinni. Þá fer nefndin með önnur þau verkefni sem borgarráð ákveður.

Skipan ferlinefndar

Ferlinefnd fatlaðs fólks er skipuð sjö fulltrúum og jafnmörgum til vara. Borgarráð kýs tvo fulltrúa; annar skal vera borgarfulltrúi eða varaborgarfulltrúi sem jafnframt skal vera formaður nefndarinnar, hinn er valinn af minnihluta í borgarstjórn. Formaður ferlinefndar er Magnús Már Guðmundsson, borgarfulltrúi. Öryrkjabandalag Íslands tilnefnir þrjá fulltrúa

og skal í tilnefningunni taka tillit til mismunandi aðgengisþarfa, svo sem aðgengi hreyfihamlaðra, sjónskertra og blindra. Þroskahjálpar tilnefnir einn fulltrúa og Félag eldri borgara tilnefnir einn fulltrúa.

Þann 1. desember 2016 áttu sæti í nefndinni eftirtaldir aðilar:

Aðalfulltrúar:

Magnús Már Guðmundsson, borgarfulltrúi og formaður ferlinefndar
Ragnheiður Gunnarsdóttir, fulltrúi minnihluta í borgarstjórn
Bryndís Snæbjörnsdóttir, fulltrúi Landssamtakanna Þroskahjálpar
Grétar Pétur Geirsson, fulltrúi Öryrkjabandalags Íslands
Ingólfur Már Magnússon, fulltrúi Öryrkjabandalags Íslands
Lilja Sveinsdóttir, fulltrúi Öryrkjabandalags Íslands
Ragnhildur G. Guðmundsdóttir, fulltrúi Félags eldri borgara

Varafulltrúar:

Bergur Þorri Benjamínsson, Öryrkjabandalag Íslands
Rósa María Hjörvar, Öryrkjabandalag Íslands
Snædís Rán Hjartardóttir, Öryrkjabandalag Íslands
Þórey Rut Jóhannesdóttir, Landssamtökin Þroskahjálpar
Hrefna Haraldsdóttir, Félag eldri borgara

Starfsmaður ferlinefndar er Tómas Ingi Adolfsson frá mannréttindaskrifstofu Reykjavíkurborgar. Fulltrúi umhverfis- og skipulagssviðs gagnvart ferlinefnd er Ólafur Ólafsson. Anna Kristinsdóttir, mannréttindastjóri Reykjavíkurborgar, situr jafnframt fundi nefndarinnar.



Ferlinefnd fundaði í Laugardalslaug 13. október 2016

Verkefni ferlinefndar 2016

Hér á eftir má sjá yfirlit yfir helstu verkefni ferlinefndar fatlaðs fólks á árinu 2016. Ferlinefnd fundaði 10 sinnum á árinu 2016 og tók nefndin 39 mál til umfjöllunar á árinu. Þar af voru 8 mál til umfjöllunar á fleiri en einum fundi nefndarinnar á árinu.

Heildarkostnaður vegna ferlimála á árinu 2016 var 55,9 milljónir króna. Er þá meðtalinn launakostnaður fulltrúa í ferlinefnd sem og umsýslukostnaður hjá umhverfis- og skipulagssviði. Upphæðin sem hér er nefnd á þó aðeins við um þá fjármuni sem fóru sérstaklega af fjárheimildum ferlinefndarinnar. Í nýframkvæmdum og endurnýjun er jafnframt hugað að aðgengismálum og kostnaður vegna þess er ekki sóttur sérstaklega til ferlinefndar. Fyrir vikið fara meiri fjármunir á ári hverju í að bæta aðgengi í borginni en þeir fjármunir sem sérstaklega eru tileinkaðir ferlimálum segja til um.

- Í sjö tilfellum tók ferlinefnd afstöðu til innanhússframkvæmda í húsnæði á vegum borgarinnar.
- Fimm mál sneru að bílastæðum hreyfihamlaðra. Uppsetningu á slíkum stæðum og staðsetningu og í einu tilfelli kynnti Bílastæðasjóður tillögu um að leggja af stæði sem ekki var talið nýtast lengur.
- Ferlinefnd var í tveimur tilfellum falið að veita umsagnir. Annars vegar var ferlinefnd falið að veita umsögn um tillögu frá samráðsvefnum Betri Reykjavík, varðandi kynlausa klefa og klósett. Hins vegar var ferlinefnd falið að veita umsögn um drög að skýrslu stýrihóps um stefnu í frítímaþjónustu.
- Ferlinefnd fékk kynningu á fjórum aðgengisúttektum sem gerðar voru á Norðlingaskóla, Sæmundarskóla, Fjölskyldu- og húsdýragarðinum og Skautahöll Reykjavíkur.
- Ferlinefnd fékk kynningu á teikningum að Dalskóla ásamt menningarmiðstöð og sundlaug í Úlfarsárdal.
- Ferlinefnd fékk kynningu á Sumargötum 2016 og hvernig hugað væri að bílastæðum fyrir fólk með hreyfihömlun við Sumargötur.
- Ferlinefnd fékk kynningu á skýrslu starfshóps um almenningssalerni
- Ferlinefnd samþykkti að gerðar yrðu aðgengisúttektir á fjórum skólum: Austurbæjarskóla, Breiðagerðisskóla, Hólabrekkuskóla og Sæmundarskóla.
- Á árinu voru framkvæmdar ferliúttektir á Hólabrekkuskóla og Sæmundarskóla og ráðist var í framkvæmdir til að bæta aðgengi í og við fjóra grunn- og leikskóla.
 - Í **Hólabrekkuskóla** var sett rafmagnsopnun á aðalinngang. Í vinnslu er að setja upp lyftu, útbúa skábraut í matsal og salerni fyrir fatlað fólk.
 - Í **Hvassaleitisskóla** er unnið að því að setja upp salerni fyrir fatlað fólk.
 - Í **Ingunnarskóla** er unnið að endurgerð á lóð til að bæta aðgengi fyrir fatlaða nemendur við skólann. Búið er að setja upp stólpa fyrir framan tröppur. Unnið

er að því að setja upp hurðaopnara við aðalinngang og hæðarstillanlegan vask inni í skólanum.

- Í leikskólanum **Múlaborg** var farið í endurgerð á skólalóð til að koma til móts við aðgengisþarfir fatlaðra nemenda.
- Við leikskólann **Gullborg** var unnið að því að bæta aðgengi á lóð eldri deildar leikskólans.

Til að bæta aðgengi heyrnarskertra að þjónustu borgarinnar voru fest kaup á tónmöskvum. Tónmöskvi er búnaður sem eykur aðgengi heyrnarskertra að töluðu máli með því að stytta fjarlægð hljóðsins sem fer frá hljóðgjafa til heyrnartækja. Tónmöskvar hafa verið settir upp á söfnum, þjónustumiðstöðvum og í félagsmiðstöðvum, í afgreiðslum Borgarleikhúss, í þjónustuver í Borgartúni og í móttöku í Ráðhúsi Reykjavíkur. Kostnaður vegna hvers tónmöskva og uppsetningar á honum er um 100 þúsund krónur.

Aðgengi var einnig bætt í Laugardalslaug með kaupum á lyftum og uppsetningu á nýjum bílastæðum fyrir fólk með hreyfihömlun við laugina. Til þess að hægt væri að komast ofan í heita potta í lauginni voru útbúin hlið á handriðum kringum pottana og handfestur voru festar á sjópott.

Laugardalslaug hefur þar að auki upp á að bjóða sérstaka klefa fyrir fólk með hreyfihömlun þar sem eru bekkir sem hægt er að hækka og lækka eftir þörfum. Einnig hafa verið keyptir sérstakir hjólastólar til afnota í búningsklefum.

Fulltrúar í ferlinefnd ásamt starfsmönnum nefndarinnar skoða lyftu við Laugardalslaug ásamt Loga Sigurfinnssyni, forstöðumanni laugarinnar.



Verkefnin framundan

Samþykkt var í borgarstjórn að stofnaður yrði stýrihópur sem hefði það verkefni að móta heildstæða stefnu í aðgengismálum fyrir Reykjavík. Stýrihópurinn sem hóf störf í ágúst 2016 á að hafa það að leiðarljósi að koma til móts við aðgengisþarfir ólíkra hópa og horfa til algildrar hönnunar þannig að umhverfi og þjónusta gagnist sem flestum. Stefnt er á að aðgengisstefnan verði send í umsagnarferli sumarið 2017 og að hún verði í framhaldinu lögð fyrir til samþykktar um haustið.

Ákveðið var að aðgengisviðurkenning Reykjavíkurborgar yrði veitt í fyrsta sinn á árinu 2017. Markmiðið með veitingu viðurkenningarinnar er að gera aðgengismálum hærra undir höfði og varpa ljósi á það sem vel er gert í málaflokknum.

Viðurkenningin var veitt þann 10. mars á málpinginu „Er leiðin greið?“ sem haldið var í tengslum við alþjólegan dag aðgengis fyrir alla þann 11. mars. Dómnefnd skipuð formanni ferlinefndar, formanni mannréttindaráðs og starfsmanni mannréttindaskrifstofu fór yfir þær tilnefningar sem bárust og var niðurstaðan sú að Blindrafélagið myndi hljóða fyrstu aðgengisviðurkenningu Reykjavíkurborgar. Mörg af brýnustu hagsmunamálum blindra hafa náðst fram af frumkvæði félagsins og þar er m.a. hægt að nefna Hljóðbókasafn Íslands, Sjónstöð Íslands og Þjónustu og þekkingarmiðstöð fyrir blinda, sjónskera og daufblinda. Auk áherslu á bætt aðgengi bæði innan og utandyra hefur Blindrafélagið undanfarin ár lagt áherslu á bætt netaðgengi og að vefsíður séu aðgengilegar blindu og sjónskertu fólki.